

Äöpeningsweurdje

Leif luuj,

Hieonger vèngk geer de nuutsbreif van juni. Veer zitte alweier bekans op de helf van 't jaor en 't WK voetbal kump noe waal heel kortbie. Höb geer uch hoes ouch al omgetouverd pès 'n richtig palies van oranje? Veer höbbe nog neit zoväöl belangstjelling veur 't voetbal, veer concentriere os op ein angere, belangrieke wedsjtied; de Zittesje zeipkisterace 2010! 'T idee veur de kis is vaerdig, de daadwielikke oetvuiering geit allein nog get tied en wirk koste.

Zo wie geer höb kenne laeze in de veurige nuutsbreif, kenne 'n aantal Vlemkes, wo onger ich zelf, neit aanwezig zeen. Ich zou uch dan ouch wille vraoge of geer veur mich mien collega's zout wille kòmme aanmoedige oppe zóndig 13 juni bie 't sjoone St. Rosa kapelke. Om 12.30 oer prizzenteiere de versjillende teams hun kis en vanaaf 13.00 oere geit de race van sjtart. Kump geer kieke? In de vólgende nuutsbreif zulle veer oetgebred versjaag doon van alle prieze die veer in ontvangs höbbe maage numme! Väöl laesplezeier!

Mit de Kómplemente,

Joyce Gijsen,
Veurzitter

Óngerwerpe van dees nuutsbreif:

- * Rubriek Modeplisse
- * Vlemkes op vekans
- * De Vlemkes rommele get aan...?
- * Groove garden
- * Vlemkes weekendje



Vlemkes op vekans

Kroese door Egypte

Door: Joyce G. en Anne

Joyce G. en Anne höbbe 't neit sjelech in de meimaondj ... Zie gaon mit de pap en de mam op vekans nao Egypte. Effekes dachte zie nog dat d'r ein duustere aswolk roet in 't aete koum gooije, mer ... ze zeen toch gevlaoge. Joyce hauw de koffers al drie waeke van te veure gepak, went 't waar bang dat 't zien ieniemienie-string-bikini zou vergaete. Anne waar de rus zelve ... ze kump immers toch altied te, te, te, te laaaaaaat. Waal is 't hoes frisj gepòts en zeen de plantje verzörg. Angesj kènt 't neit mit ein gerus hart vertrèkke. Mit ein koffer van ruim 20 killogram en handbagaasj van 6 killo ginge zie dan ouch richting Afrika. Jao, die maedjes bakke ze gaer broen. Nao ein aantal daag aan 't strandj te höbbe gelaege gaon ze nog ein cruise maake euver de Nijl vanaaf Luxor. Jao, veer heure uch al dènke, hit die plaatsj zo? Of hauwte die maedjes geweun van ein EXTREEM LUXE cruise. Tja, 't is eigenlijk ein kombenase van beide. Dus de dames gaon ein bietje kultuur sjnoeve, get kieke nao ònger angere Aboe Sumpel en zich veural door hun manne laote verwènne.

Jao, kuump Joyce dan ouch ... 2 waeke Egypte... 't waar in ein woord GEWELDIG!! Waal waar Egypte zelf ein bietje van sjlaag mit 2 vlemkes op bezoek. Oppe daag van aankóms wos 't waer neit wat 't euverkoum en begoosj 't sjpontaan te raegene. En 't hauw dao al zeeve jaor neit mee geraegend! Bekómme van de raege kreege veer nao 'n aantal daag ein richtige hittegolf. Es richtige Vlemkes höbbe veer hie goud van genaote! En 't bliek waal... Ouch op vekans zeen veer Vlemkes mit de vastelaovend bezig. Veer höbbe in Egypte al sjoon pekskes oppe kop getik veur 't kómmende seizoen!



Raege, Raege en Raege...

Door: Lotte

Ich bèn op vekans nao ZUUD-Frankriek gewaes. Ich ging veur volledige ontsjpanning, optimale broening van de huid en heerlikke cocktails bie 't zjwömbad. Doe zous zo zègke dat 't in ZUUD-Frankriek zeker zou mótte lökke. Dees gedachte veil aevel op daag ein al gans in 't water.. Raege, wèndj, kou en dikke kleier waore aan de orde van d'n daag. Tsja, en dan is 'r veur ein vroumesj maar ein alternatief; shop till you drop!

We gaan naar Zandvoort, al aan de zee!

Door: Joyce T.

In taegesjtelling tot de anger Vlemkes bèn ich lekker in òs kikkerlanjd gebleve.. Aan 't sjtrandj van Zandvoort höb ich same mit ein vriendin allein mer zon gehad! Zeve daag langk geneite van 't zönke. Mien hoogtepunt van dees daag waar toch de fitstoch die veer gemaak höbbe! Op eine richtige City Bike, doe wits waal, mit zo'n hoog sjtuur. En 't sjoonste waar dat veer eine tandem houwe.. Zo sjiek. Gans rood mit vlamme. Dus goud gesjik veur ein Vlemke... Tsja, en wieër höbbe veer allein mer get gelaege, gelaeze, gegaete en natuurlik rosé gedronke. 'T waar ein heerlikke vekans om bie te kómme van al dat helle wirke van de afgeloupe maonje!

Bella Italia!

Door: Natalie

Vekans... Zon, zee, sjtrandj en ouch nog get fein kulturele oetsjtepkes make. Dat is vekans. Die fein kulturele oetsjtepkes höbbe ze in Italië in euvervloed. Mer raege, nei, dat zouste toch zeker neit verwachte? Nou, geluif 't of neit, ouch in Italië kènne ze raege. En vööl mee es dat veer gedach houwe. Toch haet die oetblijvende zon de vekans neit verpes. 'T Waar dao Fantasties....! Ein dèngk kènne ze dao ès de beste: Lekker aete maake. Pizza, pasta, ieskes, nuim 't mer op! Dus es 't waer taeg zit, neit getreurd... De Italiaanse keuke en de prachtige omgaeving maake alles weier goud!

De Vlemkes rommele get aan ...?

Op Pinkstermaondig is 't tradiese dat Natalie en Joyce oppe rommelmert van Lömmerich sjtaon. Alles waat nog thoese ligk en neit gebroek wurt, geit mit. Dan sjtaon veer es richtige vösjwiever te verkoupe... "Alles, noe veur mer 2 euro". Dit jaor is 't zelfs zo goud gegange dat veer om 15.00 oere al òs sjpulle höbbe gepak om heivesj te gaon.. De BBQ sjting namelijk al op òs te wachte. Ein sjmakelik ènj van de daag, nao al dat helle wirke!

Vólgend jaor zeen veer zeker weier van de pertie. Dus wae nog echte 'collector's items' van de Vlemkes wilt score, sjrief 't op in de agenda!!

Door: Joyce T. en Natalie

Groove Garden

Zowie geer alleney wit haet Zitterd saer enkele jaore ein groot festival d'r bie: GROOVE GARDEN. Geer kènt 't eigelik vergelieke mit 't filmfestival in Cannes; alles dreet om 't zeen en gezeen waere. Amy en Lotte, twee vriegezelle ongerein, höbbe zich bie ein gepak, t nuutste kledje aangedaon en de zonnebril oppe naas gezat. Dao ginge de vlemkes heur; Löpkes getuit en ...

'T waar mich 't feeske waal heur. Luuj van wiedz weg kwame veur dit festival noa Zitterd. De gekste kreases kwame veurbie. Groovy waar 't zeker waal. Ouch 't waer wirkde mit om d'r 'ne gesjlaagde daag van te maake. Om ein oer waar 't weier veurbie. Alle bonne waere op, d'r woort nog ein fritje gegaete en de meziek waar gedaon.

Oppe zóndig waore bienao alle Vlemkes van de pertie en höbbe ze mit vrunj ein richtig feeske geboewd.

Op nao volgend jaor!

Door: Lotte

Vlemkes weekendje

Op drie en veier juli vènk os jaorlikse Vlemkes weekend plaatsj. Veurig jaor waar 't ein groot sukses en dit jaor perbeiere veer dat natuurliek te evenare. Zo wie altied verklappe veer neit wo veer haer gaon. En natuurliek ouch neit waat veer gaon doen. Mer ein paar hints wille veer waal alvas aan uch kwiet. Hie kòmme ze:

- 't kènt d'r naat zeen
- Op einig mement kènne kampeiersjpulle goud van pas kòmme
- Ein bietje richtinggevuul is waal gewunsj
- Doe mós dich ein bietje verdeipe in anger kulture
- Zörg ouch veur ein bietje leich in de duusternis
- Num de tiegerbalsem mer alvas mit!



Misjiens in 'ne Treetent?


Höb geer al ein idee? Ós möndje blif lekker op sjlaot. Laot uch maar verrasje. Natuurlik zulle veer sjtraks oetgebred versjlaag doon van òs weekendje. Alle roddels zulle veer dan mit uch deile. Mer pès daen tied nog ein bietje geduld. Veer verrasje uch, veer verrasje uch...

Door: Marjolein

Rubriek: modeplisse



Dees maondj in de rubriek mode: *Sjraar Cox*, oze burgemeister. Deze sjarmante grieze man haet politicologie gesjtudeerd aan de Universiteit in Nijmegen en is saer 1 oktober 2006 burgemeister van òs sjtad. Zien hobbies zeen: tennisse (kompetiese speele), 't bereide van kulinaire lèk-vènger-lèk-doem- gerechte ("kaoke") en hae geit gaer èns kieke nao Fortuna es ze ein belke trappe. Oze burgemeister geit dèks gekleid in ein kesjtuum. In de wèntjer is hae meestal duuster gekleid: zjwart of donkerbroen. Mer in de zomer hilt hae ouch van lichtere kleure zo wie: leichblau, beige en leich gries. Dao ónger dreeg hae ein slimfit blouse mit ein ruutjespatroon en dao op de kravat. Bie de get lossere gelaege dreeg hae 't humme nonchalant aoep. 'T Witte T-shirt onger zien humme is dan goud te zeen, helaas ein ronde hals. Oze veurkeur zou oetgaon nao ein get vlotter v-halsje.



Euver 't algemeen is de burgemeister formeel gekleid, passend bie zien funktie mer veer vrouluuj zoue häöm gaer èns in ein vlotte blouse mit laere jack euver sjtraot zeen gaon. Mit een bietje gel in dat sjarmante grieze haar en ein sjoon donker sjpijkerbòks kènt de burgemeister in zien vrieje tied nog trendy veur d'n daag kómme. Zien oetsjtraoling is euver 't algemeen vruntjelijk en ouch zien hoed is goud gebroend. Veer zeen dus euver 't algemeen greutsj op dees sjpontane burgemeister.

Eindsiefer voor oze heer Cox: 8-

Door: Nada van Nie en Patty Zomer

Óngerwerpe nuutsbreif 5

In de nuutsbreif 7 kènt geer ónger angere laeze euver:

- * Rubriek Modeplisse
- * Zeipkisterace
- * Vlemkes weekendje
- * En nog mee, en nog mee, en nog vää! mee!!